

بِسْمِ اللَّهِ الرَّحْمَنِ الرَّحِيمِ



PANDO'AN

Sii sa Hadapan o Kalangowan o Insan sii sa Doniya

as Salamo Alaykum wa Rahmatullahi wa Barakatoho

Pphagarapn ami sii ko Allah a Mahasoti a Maporo' a katatapa niyan rkitano sii ko limo' iyan sa mitataros tano so kiababayaano tano a galbk ko Islam a piakaokit tano sii sank'a'i a Ompongan tano a al Insan Islamic Assembly.

Manga Insan ami,

Sii sank'a'i a kiasagad anka'i a ika pat polo ragon a Kiplimod tano (40th Annual Convention) na miagdam tano so kiawatani rkitano sii ko lalakaw tano ko giikapromasay sii ko Da'wah, sa manga papata' ini a go toos sa mataan a matatago' tano sii ko thitho a lalan o Islam, sabap sa kainotan a Ompongan a lomagaday sa datar aya a malndo a masa inonta a mabinntay skaniyan ko kidozo' a go kasagomparak sabap ko di kapakasoson ko thitho a lalan. Kiamasaan tano so miambtad o manga salakaw a lompokan sii sa doniya a miasogat a kidaplak odi' na kasagala sabap ko di kapakaaotod o antap iyan odi' na sabap ko kiasaagi ron sa salakaw a antap odi' na baya' a ginawa, sa miakatonay ron oto sa kialobayi ron odi' na taplk a minigobar so taragombalay niyan sa tarotop.

Sii sank'a'i a bago a administration o Insan a totonggo'an o Murshid, na aya khilapoy ami rkano a manga galbk a plnganan sa panamar o manga Insan, na aya paganay ron a miokit sa kiaompongan ko longowan a membro so kapnggalbka on, na so kapakatindg o Officena a Insan.

Giyanka'i a phakatindgn a Pangadapan (National Office) na kna' o ba so kapipikira on o kadaklan a so kapagapin sa kowarto a ron pkhalimod so manga Insan. Aya mataan na aya bantak san na so kaphakatindga ko Pangadapan o Insan sa bontal a tatap a go kakal sa dayon sa dayon.

Sa aya kakhaadn anan na makakowa tano sa lopa' a malo maolad sa mapamasa tano sa giyanan i paganay a romasay tano a langowan a Insan. Makakowa tano sa lopa' na zakat tano ko ika dowa a mala' a galbk a so kapmbalay tano sa officena tano. Giyankaya a officena tano na makaiibarat sa satiman a walay a manga tlo ka andana. So paganay a andana iyan na so manga bilik o manga Lujnah (committees) na so ika dowa a andana, na so officena o Murshid a go so mangorsi ko Shura a go so manga pd a go so Public Library tano a thago'an sa pimbarang a manga kitab a Arabic a go English a khabaloy a darpa' a giipangilayan (research) o langowan a mamponay sa kata'o a phanorat sa kitab. Na so ika tlo ka andana, na giyoto so kalimodan a lankap o Insan a ron pkhatimo' so manga Insan ko manga meeting iyan a go so langowan a seminar a kaiislami a phagadnn tano sa pantag ko Da'wah.

Adn a pmbalayin tano a masjid a giyoto i ika dowa a taragombalay tano a di tano anan khiawid a akal ka madakl a phakaogop rkitano a manga taw a pphanabang ko datar anan, asar ka adn a lopa' tano a maolad a domadait on

Ika tlo a taragombalay na so Guesthouse a Insan a pkhatarosan o manga bisita o Ompongan a makapopoon sa sold a go sii sa liyo a Filipinas sa giyankanan a walay na makararankom sa manga bilik a kna' o ba tanto a madakl.

Amay ka makamoayan anka'i a mala' a galbk o Insan, na khakilala a so Ompongan na miakambkn, sa khaator iyan so manga galbk iyan ko Da'wah ka miatndo' so darpa' iyan a pkhasongowan on o manga Muslim a gii niyan ithabanga' ko manga galbk iyan.

Giyanka'i a plano tano na mala' ini a galbk ka khaosaran sa million a pirak, na lalayon a so manosiya na anda i kailaya niyan ko kanggasto sa mala' na aya dn a khaona on na so kambokla on amay ka da sii ko poso' iyan so panamar ko kapakapd ko galbk a mapiya a khatatap so balas iyan. Adn kiran a aya khapikir iyan na ipamangni ko manga salakaw a pphanabang ko Islam ka kagiya so galbk na lankap a kamapiyaan o manga Muslim, sa bnar oto a pamikiran a so galbk a Islam na kaphamagogopaan o langowan a Muslim, ogaidd na so Ompongan a magawid ko pamikiran na patot a aya on kasanggolayan sa paganay, ka mapasang so phangogop o mapasang so pagogopan.

Kowaan tano sa ginawa tano anka'i a tindg o Mranaw a aya kabaya' iran na so langowan a galbk ko agama na izana ko manga Arab a giimanabang ko Islam sa siran bo'. Opama o giyanan i masowa' a so mataan na giyanan dn i kaphlalakaw niyan imanto, na anda i kapnggasto tano sii ko Islam? Aya tomoon tano na sii sa Alonganamaori na lomalangag tano sa gii tano mbantayan so manga Arab a mianabang ko kiambalay sa agama a pphragonn iran so manga balas iran, na so manga Insan na kambantay bo' a rk iran, ka kagiya da siran on pamangpd ko da iran pn kapamatay.

Manga Pagari ami a manga Insan, masa ini imanto a khaparo tano a kapakaogop tano sa nggolalan sa tamok a go galbk, na mamakot tano sa sii ko kaaadni rkitano sa tamok na adn a miogop tano ron ko Islam sa nggolalan ko kapakatindg o Pangadapan tano.

Mbalowin tano anka'i a galbk a aya onayan o panamar tano sa phraginot tano sa taman sa kasamporna o galbk tano. Anda i kailaya o Allāh sa miagikhlas so manga poso' tano ko kapnggalbka san na phakaoma so panabang iyan sa kasamporna o mapiya a antap tano.

So langowan a sakodo o Insan ko Islam a go so pagtaw a Muslim sa Pilimpinas na misasankot so kaphamondiyong iyan sii ko kapakamoayan ankaya a Officena tano. Anda i kapakaphoon tano ko kambalay a khaparo a adn a khakadnan tano ron, na so Murshid iyo na roo dn pkhomadn sa thawagn tano so manga Muslim ko kiphangndaon tano kiran ko manga kitab a minipanorat tano a go phangndaon tano siran ko tafsir o Qur'ān a go so Hadith o Nabī sa zinanadn tano siran sii ko Islam sabap sa miadianka' tano dn so manga kata'o a minipanorat tano na miaoma so masa a pagantonn tano anka'i a manga kata'o sii ko manga poso' o manga taw tano ka an tano makapokas sa kataksilan sii ko Allāh sa mataan a mianamar tano ko kianggalbka tano ko Da'wah sa kisampay niyan ko manga taw.

Langowan a mapiya a pamikiran a go galbk na aya kaphanatas iyan a go kaphrarad iyan ko manga taw na maadn so darpa' a ron pphakapoon ankoto a pamikiran a go galbk sa kaphzinanada niyan ko manga salakaw. Sa da' a miabagombar a galbk a Ompongan a

giyankoto a ompongan na da' a darpa' iyan a khatoonan on a datar o ba da' a thontokan sa ganot iyan ka di makamomoayan.

Sowaan tano so siowa o manga pd a Ompongan a piakatindg iran so Pangadapan iran sa sii ran bo' kinowa ko manga oyot iran na miakaapas siran. Giya Markaz as Shabab imanto na so kiaalin o Administration iran na miamikir siran sa kapmbalay ran sa Pangadapan iran na imanto na miapakatindg iran so taragombalay ran a tlo ka andana sa obay a ISES a mapiya i paras a walay. Na inizaan akn so komikibir on na da' a pinggasto iran on a rowar ko phoon sa ginawa iran na miakapasad siran sa da masaragon a kianggalbka iran on.

Sa manga Insan ami, giyanka'i a plano tano na pantaga'i ko soasoat tano ko Allāh, na panagontamanan tano, ka amay ka makamoayan aya na so langowan a galbk iyan ko Islam na kapnggonaan tano ko kaoyagoyag tano a go sii ko oriyen o kapamatay tano a zadka jariyah tano a da' a ikhapos iyan. Na sa dn sa kalaan on na aya mala' i balas ko Alonganamaori, sa mamikal tano a go managontaman tano sa kapakambts tano sa mapiya a amal tano, ka mataan a miakarani tano dn ko pat pasagi' ka o sii pagilaya ko manga omor tano na mianondagay tano dn ko kaphthana' tano ko talbo. Sa arapn tano ko Allāh so mapiya sii ko doniya a go sii ko akhirat.

Mapipkir ami a pmbaal tano sa Coupon a misosorat on so manga arga' a datar o 50, 100, 1000, 5,000 a roo pzamili' so thabang o pira i howaan iyan on, sa giyankoto a coupon na amay ka potoln so sapotol on na adn a mibabagak on a sapotol a kasosoratan ko arga' a initabang iyan ka an mapiya a kaator iyan sa di ron mamakasold so kadadag o pirak a initabang o tomiabang on. Miasima' akn anan sa Qatar ko kiasong akn roo a go sii sa Saudi, sa pkhaona so kaphrilisa ko coupon na amay ka madianka' so pirak sa miatimo' iran na pakatindgn iran so taragombalay a pmbalayin iran. Khapakay anan a sayanan tano ka an kaimpidi so kakhapti tano ko pamirak o Project sa makasarig so manga taw a magogop sank'a i a mala' a galbk ko Islam.

So manga pd a galbk a kiaayonan o General Assembly ko Convention na so kapakabagra ko relation o manga District sa sold a go sa liyo, so kapagimasada ko Paraatoran a Insan, sa milapoy rakano bo' o President tano a langon anan na galbk a mala' on a khagaga so kanggalbka on.

Giya pman ankanan a paganay a plano na mataan a mapn'd ka kagiya aya dn a giobat iyan na so manga oyot tano a go so manga logi' tano, na saya dn khailay so panamar o nggagaisa a Insan a adn a tamok iyan i taman a kala' o panamar iyan ko Islam sa nggolalan ko kitaros o Plano tano.

Kna' o ba akn inilapoy so kia convention ka galbk anan o Tanfidi sa pakatokawn akno iran bo'. Giyanka'i a miangaaloy akn na mataga'i partial a inpd akn sank'a i a Pando'an a pphakambowatn tano oman saolan ko kaphagisipa tano sa ginawa tano a manga Insan. Sa pangoyat akna'i ko kababaloy akn a Murshid a ipzampay akn rkano sa okit a kapranoranon a go kapangoyat ka an makaoman ko panamar iyo sa kasamporna o manga pipiya a antap tano a sii pphakaokit ko Ompongan a Insan.

So Murshid iyo na lalayon dn makapagiino sa pkhaizaan iyan a ginawa niyan o antonaa i sabap a so manga pari o agama a Nasrani odi na Yahud, na pphakaadn siran sa manga pipiya a paganadan sii sa doniya, na so manga Muslim a miamanabot a pd iran so manga ulama iran na da dn a miapakatindg iran a mapiya a Madrasah odi' na iskowilaan a miakarpng sii sa doniya. Miabatiya akn a so Harvard University a da dn a lawan iyan a mala' a go mapiya a University sa doniya na aya miphoon on na sakataw a pari a si Robert Harvard sii sa England, sa piphasa

niyan a langowan a tamok iyan sa piakatindg iyan so Robert College, na miakatoon sa tlo kataw a pari na minipagpda' iyan siran na gowani a ringasaan siran o manga protestant sa England ka kagiya sitan na Puritan a secta iran na tomiogalin siran sa America, na so kiambalaya iran ko Iskowilaan iran na miawafat si Robert sa kiaganatan iyan kiran so iskowilaan na sabap ko kiailaya o manga pd iyan ko panamar iyan na mianamar siran mambo' sa kitaros o simalaw niyan na inisambi' iran ko ngaran o iskowilaan iran so Harvard a so apilido i Robert na katatan imanto a da dn a lawan iyan a mala' a paganadan ko doniya.

So Ompongan a Insan na da' a lawan iyan a Ompongan sii sa Pilimpinas a kaaasaan sa manga Professionals ko pithibarang a kata'o a go adn a manga ulama iyan a khapakay mambo a pkhiitong ko manga ulama sa Pilimpinas, a go iinamn o pagtaw niyan a so Insan i malalamba' a panginam a magompiya ko btad. Na ino tano di pmbagobago manga Insan, sa manamar tano sa katantowa tano ko maiinam rkitano o pagtaw tano sa di siran maola ko kapipikira iran rkitano sa tindgn tano anan a kaya' sa mangni tano ko Allah sa tabang sa kiapasn tano ko manga galbk tano a aya mala' on na so kapakatindg o Pangadapan tano.

Giyankanan a Pangadapan na kna' o ba patipating dn a officena bo' ka aya mataan na giyanan na salag o kat'o sii ko Islam a khapoonan o sindaw a plindawan iyan so mbalabala' sii sa Pilimpinas ko kapagndaowa ko pagtaw a Muslim sii ko manga gonana'o o Islam a pmbaloy a datar o Academy a pkhapoonan o kata'o, ka oman alongan a Jumu'ah na malimod so manga Muslim ko masjid iyan na pangosiyatan siran sa mapiya, sa kataalok iran ko manga seminar a phagadnn sankanan a darpa'.

Manga Insan ami, pphangnin tano ko Allah a giyanka'i a ragon a kaphalalagoy o Insan na ragon ai a masibokar ko langowan a katampar o galbk o Insan, ka kagiya miada' so kaaadn o manga tindg a giimamagagaw sa kipaarn iyan ko ompongan, sa miaisaisa so tindg sa kapnggalbk o Insan sa kisampay niyan ko apta' iyan a mala'.

So manga mosawir iyo ko ikapiya o manga galbk tano ko Insan na sangat dn a mazisimalaw ami a manga pagari niyo a sasanggolayan iyo ko mala' a romasay o Ompongan tano, sa so onayan a kapmomosawira na giyanan i lalan o gii tano kanggalbk a rapg o kathotomankd a go so kapagiikhlas tano.

Wassalamo Alaykum,



Hassanor bin Maka Alapa
al Murshid

4 January 2015